

# **Visoki predstavnik dao prioritet povratku imovine policajcima**

Visoki predstavnik Wolfgang Petritsch je danas donio odluku kojom se daje prioritet povratku stambenih jedinica policajcima – povratnicima u oba entiteta. Od stambenih organa, koja su prema imovinskim zakonima obavezna da zahtjeve za povratak privatne i društvene imovine rješavaju po hronološkom redosljedu primanja ovih zahtjeva, sada je zakonski traženo da imovinske zahtjeve policajaca-povratnika, kao izuzetak, smatraju prioritetom.

Visoki predstavnik je ovu Odluku donio u svrhu promoviranja povratka policajaca, tzv. pripadnika manjinskih naroda u skladu sa Okvirnim sporazumom o restrukturiranju, reformi i demokratizaciji policije u Republici Srpskoj i Sporazumom o restrukturiranju policije u Federaciji, kao i nedavno donesenim izmjenama i dopunama entitetskih ustava u skladu sa kojim nacionalni sastav javne uprave na svim nivoima mora odražavati popis stanovništva iz 1991. godine. Ubrzani povratak policajaca – pripadnika manjinskih naroda je važan za proces cjelokupnog povratka, s obzirom da većina povratnika, tzv. manjinskih naroda, smatra da im prisustvo policajaca – pripadnika manjinskih naroda u lokalnoj policiji, predstavlja garanciju sigurnosti u njihovim predratnim općinama.

Policajci koji žele da njihovi zahtjevi za povratom imovine budu riješeni kao prioritet, moraju nadležnim stambenim organima dostaviti slijedeće dokaze:

1. Dozvolu za rad koju izdaje Misija Ujedinjenih naroda u Bosni i Hercegovini i u kojoj se navodi da se nosilac dozvole vraća da radi kao policajac u mjesto u kojem je imao prebivalište na dan 30. aprila 1991. godine.

2. Dokaz da je zahtjev za povratom stambene jedinice podnesen prije dana donošenja ove Odluke u skladu sa imovinskim zakonima.

3. Dokaz o trenutnom mjestu prebivališta policajca, kao i njegovih roditelja, djece, supružnika i svih članova porodičnog domaćinstva koji su kao takvi bili prijavljeni 30. aprila 1991. godine ili nakon tog dana.

4. Ukoliko policajac nije lično podnio zahtjev za povrat imovine potrebno je podnijeti dokaz da je živio u traženoj imovini 30. aprila 1991. godine ili izjavu koja je, pod punom materijalnom i krivičnom odgovornošću, potvrđena potpisima najmanje dva svjedoka i ovjerena od strane nadležnog suda.

Ova Odluka visokog predstavnika stupa na snagu danas, i ostaje na snazi do 31. decembra 2002. godine. Odluka će, bez odlaganja, biti objavljena u službenim glasilima Republike Srpske i Federacije.